

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA**

OBRADIVAČ:

- 1. SLUŽBA ZA URBANIZAM**
- 2. SLUŽBA ZA NORMATIVNO-
PRAVNE POSLOVE**

NACRT

O D L U K A

o privremenom korištenju javnih površina

Zenica, novembar 2023. godine

Na osnovu člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH", br. 49/06 i 51/09), člana 21. tačka 2. i člana 116. Statuta Grada Zenica ("Službene novine Grada Zenica", broj 5/15), Gradsko vijeće Zenica, na sjednici održanoj _____ godine, donijelo je

O D L U K U

o privremenom korištenju javnih površina

DIO PRVI - OPŠTE ODREDBE

Član 1.

(Predmet)

(1) Ovom odlukom utvrđuju se opšti uslovi za davanje na privremeno korištenje javne površine, vrste i namjene privremenih objekata, naprava i opreme koje se mogu postaviti na javnu površinu, uslovi i kriteriji privremenog korištenja javne površine, odobrenje za privremeno korištenje javne površine, period korištenja, način utvrđivanja visine naknade, plaćanja naknade, nadzor i upravne mjere, kao i druga pitanja od značaja za privremeno korištenje javne površine na području grada Zenica.

(2) Pod privremenim korištenjem javne površine podrazumijeva se pravo postavljanja objekata, naprava i opreme na dijelu javne površine na određeno vrijeme, na način koji ne utiče na promjenu karaktera javne površine.

Član 2.

(Gramatička terminologija)

Gramatička terminologija korištenja muškog i ženskog roda za pojmove u ovoj odluci uključuje oba roda.

Član 3.

(Javna površina)

Javnom površinom u smislu ove odluke smatra se površina zemljišta namijenjena opštoj upotrebi, a to su:

- a) javne saobraćajne površine: ulice, ceste, trgovi, javni prolazi (kroz zgrade, između zgrada i drugi otvoreni prostori ispred zgrada), javna stepeništa, pješačke i biciklističke staze, mostovi, skverovi, javna parkirališta, pločnici, pothodnici, kao i ostale površine javnog saobraćaja u mirovanju,
- b) javne zelene površine: parkovi, drvoredi, živice i žive ograde, obale rijeka i vodotoka, dječija igrališta, zelene površine uz ceste u naselju, uz stambene, stambeno-poslovne i javne objekte i ostale slične površine,
- c) uređene rekreacione površine i sportska igrališta,
- d) stajališta javnog autobusnog saobraćaja, taxi i biciklistička stajališta,
- e) otvoreni pijačni i tržišni prostori oko prodajnih objekata, gradske česme i fontane,
- f) neuređene javne površine i prostori, neizgrađena građevinska zemljišta do privođenja krajnjoj namjeni.

Član 4.

(Namjena)

Javna površina može se privremeno koristiti za sljedeće namjene:

- a) postavljanje kioska do 20 m²,
- b) postavljanje ljetne bašte ispred ugostiteljskog objekta,

- c) postavljanje slobodnostojeće ljetne bašte,
- d) postavljanje zimske bašte ispred ugostiteljskog objekta,
- e) postavljanje slobodnostojećeg prodajnog stola – tezge ispred trgovinskog objekta za prodaju i izlaganje robe,
- f) postavljanje slobodnostojećeg izložbenog ili prodajnog stola (pokretne tezge) za prodaju ukrasnih predmeta, cvijeća i slično,
- g) postavljanje promotivnog štanda,
- h) prodaju umjetničkih slika, pečenjarskih proizvoda i slično,
- i) održavanje kulturnih, zabavnih, sportskih i drugih manifestacija,
- j) smještaj, odnosno postavljanje cirkusa, luna parka, ringišpila, dječije igraone – trampoline i drugih zabavnih sadržaja,
- k) postavljanje reklame (reklamni pano, reklamni natpis, reklamna vitrina, reklamno platno, jarbol za zastave, reklamna klupa i slično),
- l) postavljanje oglasne ploče, oglasnog stuba, oglasnog ormarića, info table i putokaza,
- m) postavljanje rashladnog uređaja (frižidera) za prodaju napitaka i sladoleda,
- n) postavljanje bine za manifestaciju,
- o) postavljanje gradilišne ograde, odnosno formiranje površine sa koje se vrši građenje objekta,
- p) postavljanje građevinske fasadne skele,
- r) druge namjene koje je moguće obavljati na javnim površinama.

Član 5.

(Privremeni objekti)

Pod privremenim objektima, napravama i urbanom opremom iz člana 4. ove odluke, podrazumijevaju se:

- a) Kiosk - montažno-demontažni objekat površine do 20 m² koji služi za obavljanje određene djelatnosti, koji mora biti tehnički i oblikovno primjerno izveden, uklopiv u urbani prostor i estetski prihvatljiv, uz manipulativnu mogućnost premještanja i uklanjanja sa lokacije,
- b) Ljetna bašta ispred ugostiteljskog objekta - postavlja se radi pružanja ugostiteljskih usluga na otvorenom prostoru, isključivo ispred ugostiteljskog objekta, sa pripadajućim mobilijarom: stolovima i stolicama, nenatkrivenih ili natkrivenih suncobranima, industrijski sklopivom tendom ili lakom konstrukcijom izrađenom od metalnih ili drvenih montažno-demontažnih elemenata,
- c) Slobodnostojeća ljetna bašta - postavlja se radi pružanja ugostiteljskih usluga na slobodnim otvorenim površinama i nije direktno vezana za određeni ugostiteljski objekat, sa pripadajućim mobilijarom: stolovima i stolicama, nenatkrivenih ili natkrivenih suncobranima, industrijski sklopivom tendom ili lakom konstrukcijom izrađenom od metalnih ili drvenih montažno-demontažnih elemenata,
- d) Zimska bašta – montažno-demontažni objekat, čelične konstrukcije, obložena AL profilima, zatvorena kliznim staklenim stijenama, koja zauzima prostor koji inače zauzimaju ljetne bašte, sa pripadajućim mobilijarom: stolovima i stolicama, postavljena ispred ugostiteljskog objekta, naslonjena na njega ili kao odvojeni (samostalni objekat),
- e) Prodajni slobodnostojeći sto ili pokretna tezga - lako pokretni objekat otvorenog tipa (izuzetno, zbog specifičnih potreba može se dozvoliti i zatvorena konstrukcija) namijenjen za izlaganje i prodaju robe, čestitki, cvijeća i drugih ukrasnih predmeta prilikom obilježavanja novogodišnjih, državnih i vjerskih praznika, suvenira, proizvoda starih i tradicionalnih zanata, proizvoda domaće radinosti, knjiga i umjetničkih slika,
- f) Prodajni izložbeni pult - montažna konstrukcija koja se postavlja ispred objekta trgovinske ili uslužne djelatnosti, radi izlaganja, reklamiranja i prodaje prehrambenih artikala (voća, povrća) i cvijeća,

- g) Promotivni štand - pult ili sto koji se postavlja na javnu površinu u cilju podjele promotivnog materijala,
- h) Reklama - slobodnostojeći reklamni objekat (reklamni pano tipa: jumbo, billboard, megabilboard, totemi, reklamne vitrine tipa: city light, jarbol za zastave, reklamna klupa, reklamni stub i slično) koji se postavlja na javnu površinu radi oglašavanja i isticanja reklamne poruke, kao i na zemljište koje je u vlasništvu drugog fizičkog ili pravnog lica uz saglasnost vlasnika tog zemljišta,
- i) Oglasna ploča, oglasni stub, oglasni ormarić, info tabla i putokaz - objekat koji se postavlja na javnu površinu radi davanja objava informativnog karaktera,
- j) Rashladni uređaj - uređaj za izlaganje i prodaju napitaka i sladoleda,
- k) Aparat za kokice, kestenje, kukuruz, palačinke i uređaj za pečenje pečenjarskih proizvoda - uređaj sa radnom površinom od nehrđajućeg materijala, koja se lako čisti i pere i sa odgovarajućim prostorom za smještaj boce za plin,
- l) Cirkus, luna park, ringišpil, dječija igraona - trampolina, dječiji autić, vozić i druge zabavne radnje - naprave za zabavu i razonodu djece,
- m) Bina za manifestaciju - montažno-demontažni objekat koji se postavlja za izvođenje zabavnog programa i drugih manifestacija,
- n) Gradilišna ograda, građevinska fasadna skela - postavlja se na javnoj površini pod uslovima i na način kako je to utvrđeno Odlukom o komunalnom redu,
- o) Ostala privremena korištenja javne površine - podrazumijeva korištenje javne površine u svrhu postavljanja stubova za internet priključak, GMS baza, razvodnih ormara, antenskih i sličnih stubova, kao i u svrhu održavanja kulturnih, zabavnih, sportskih, humanitarnih i drugih manifestacija specifičnog sadržaja koji nisu obuhvaćeni u prethodnim tačkama ovog člana.

Član 6.

(Korisnik javne površine)

- (1) Pravo na korištenje javne površine u smislu ove odluke ima pravno lice registrovano za obavljanje određene djelatnosti i fizičko lice koje ima odobrenje za obavljanje djelatnosti za koju se traži korištenje javne površine (u daljem tekstu: korisnik).
- (2) Korisnik kojem je odobreno privremeno korištenje javne površine, ne može istu drugom licu ustupiti na korištenje.
- (3) Pravo privremenog korištenja javne površine stečeno na osnovu odredbi ove odluke, izuzetno se može prenijeti na drugo lice (u slučaju prodaje objekta, nasljeđivanja, poklona) uz prethodnu saglasnost davaoca javne površine na korištenje.
- (4) U slučaju prenošenja prava iz prethodnog stava, novi korisnik može odobrenu površinu koristiti pod istim uslovima i do roka na koji je ista ustupljena njegovom prethodniku, o čemu se zaključuje novi ugovor o korištenju.

Član 7.

(Zone)

Područje grada Zenica u pogledu korištenja javne površine dijeli se na Ekstra zonu, I-a zonu, I i II zonu:

- a) Ekstra zona obuhvata područje ulica Maršala Tita, Muhameda Seida Serdarevića, Stara čaršija, Trg Alije Izetbegovića, uključujući i plato kina „Ekran“, Talića brdo, Londža i Bulevar Ezhera Eze Arnautovića (dio od spoja sa ulicom Talića brdo do spoja sa ulicom Jevrejska).
- b) I-a zona obuhvata područje ulica Sarajevska (dio od početka ulice do „Bojina vira“), Armije BiH, Islambegovića put, Dr. Safvet bega Bašagića, Kučukovića put, Mehmedalije Tarabara, Masarykova, Školska, Branilaca Bosne, Dr. Abdulaziza Aska Borića, Bulevar

Kulina Bana, Bulevar Kralja Tvrtka I, Fra Ivana Jukića, Fra Grge Martića i Bulevar Ezhera Eze Arnautovića (izuzev dijela koji je obuhvaćen Ekstra zonom).

- c) I i II zona određene su granicama zonske podjele građevinskog zemljišta kako je to utvrđeno odlukom koja reguliše oblast građevinskog zemljišta na području grada Zenica, s tim da su iz tih zona izuzete ulice koje su obuhvaćene Ekstra i I-a zonom.

DIO DRUGI - USLOVI I KRITERIJI ZA PRIVREMENO KORIŠTENJE JAVNE POVRŠINE

Član 8.

(Plan korištenja javnih površina)

- (1) Postavljanje privremenih objekata, naprava i opreme iz člana 4. Odluke vrši se na osnovu Plana korištenja javnih površina na području Grada Zenica (u daljem tekstu: Plan).
- (2) Plan donosi Gradsko vijeće na prijedlog Gradonačelnika, svake godine, a u pripremi istog učestvuje služba nadležna za poslove prostornog uređenja.
- (3) Plan predstavlja osnov za izdavanje odobrenja za korištenje javne površine, a sastoji se iz tekstualnog i grafičkog dijela.
- (4) Tekstualni dio Plana sadrži bliži opis i broj lokacija koje se daju na korištenje sa sadržajem i namjenom istih.
- (5) Grafički dio Plana sadrži prikaz planiranih lokacija za privremene objekte, naprave i opremu, odnosno namjene sa odgovarajućim oznakama i dimenzijama, s tim da su u grafičkom dijelu prikazane samo lokacije ljetnih bašti koje se nalaze u obuhvatu Ekstra i I-a zone.

Član 9.

(Dodjela lokacija)

Lokacije za privremeno korištenje dijela javne površine dodjeljuju se na sljedeći način:

- a) za namjene iz člana 4. tačka a) i c) ove odluke, te za reklamne panoje tipa jumbo, billboard, megabilboard, reklamne vitrine tipa: city light, reklamni stub i slično, na osnovu javnog nadmetanja,
- b) za ostale namjene na osnovu odobrenja izdatog od strane službe nadležne za poslove prostornog uređenja.

Član 10.

(Javni oglas)

- (1) Postupak javnog nadmetanja provodi se putem javnog oglasa za prikupljanje ponuda za privremeno korištenje javne površine.
- (2) Javni oglas se objavljuje najmanje u jednom od dnevnih listova i na web stranici Grada Zenica i ostaje otvoren 15 dana.
- (3) Javni oglas za prikupljanje ponuda za privremeno korištenje javne površine sadrži:
 - a) podatke o lokaciji za koju se provodi javno nadmetanje,
 - b) površinu lokacije,
 - c) vrstu objekta predviđenog za postavljanje (veličina, namjena, izgled i tip montažnog objekta, slobodnostojeće ljetne bašte, reklamnog panoa),
 - d) početni iznos naknade za korištenje javne površine, način i rok plaćanja iste,
 - e) vrijeme trajanja korištenja,
 - f) rok za podnošenje prijave,
 - g) naziv i sjedište organa kojem se podnose prijave,
 - h) način podnošenja prijave i naziv dokumenata koje je učesnik dužan priložiti uz prijavu,
 - i) termin javnog otvaranja ponuda,
 - j) način obavještanja o rezultatima javnog oglasa,

- k) napomenu da se neće razmatrati prijave lica koja imaju dugovanje prema Gradu Zenica po osnovu neizmirenih obaveza na ime naknade za korištenje javne površine, zakupa poslovnog prostora i komunalne naknade.

Član 11.

(Prijava na javni oglas)

- (1) Prijava za sudjelovanje na javnom oglasu sadrži:
- a) ovjerenu fotokopiju rješenja o upisu u sudski registar za pravna lica ili aktuelni izvod iz sudskog registra ne stariji od tri mjeseca, odnosno odobrenje nadležnog organa za obavljanje djelatnosti za fizička lica ne starije od tri mjeseca,
 - b) visinu ponuđene naknade za privremeno korištenje javne površine,
 - c) dokaz o izmirenim poreznim obavezama i doprinosima ponuđača nakon objave javnog oglasa,
 - d) potvrdu nadležnih službi Grada Zenica da ponuđač nema neizmirenih obaveza po osnovu zakupa gradskog poslovnog prostora, naknade za korištenje javne površine i komunalne naknade ili potvrdu javnog preduzeća kojem su povjereni poslovi vezani za obračun naknade za korištenje javne površine i komunalne naknade,
 - e) potvrdu Centralne banke da računi ponuđača nisu blokirani u posljednja tri mjeseca.
- (2) Prijava za sudjelovanje na javnom oglasu predaje se neposredno na protokol Grada Zenica ili putem pošte u zapečaćenoj koverti sa naznačenim podacima o podnosiocu prijave i javnom oglasu na koji se prijavljuje ponuđač.

Član 12.

(Komisija za provođenje javnog oglasa)

- (1) Postupak javnog nadmetanja provodi Komisija sastavljena od tri člana koju imenuje Gradonačelnik na period od 2 godine.
- (2) Zadatak Komisije je da otvori zaprimljene prijave, provjeri formalnu ispravnost istih, izvrši rangiranje dostavljenih ponuda ponuđača koji ispunjavaju uslove javnog oglasa, te da u roku od pet dana od dana isteka roka za prijavu na javni oglas, zapisnik sa prijedlogom zaključka o dodjeli lokacije na privremeno korištenje javne površine ponuđaču sa najpovoljnijom ponudom, dostavi Gradonačelniku.
- (3) Najpovoljnija ponuda je ponuda učesnika javnog oglasa sa najviše ponuđenom cijenom. U slučaju da dvije ponude imaju isti iznos najviše ponuđene cijene, prednost ima ponuđač čija ponuda je prva zaprimljena.

Član 13.

(Zaključak o dodjeli lokacije na privremeno korištenje javne površine)

- (1) Zaključak o dodjeli lokacije na privremeno korištenje donosi Gradonačelnik i isti se objavljuje na web stranici Grada Zenica.
- (2) Protiv zaključka o dodjeli lokacije na privremeno korištenje, učesnici u postupku imaju pravo podnošenja prigovora Gradonačelniku u roku od osam dana od dana objave na web stranici Grada Zenica.

DIO TREĆI - ODOBRENJE ZA PRIVREMENO KORIŠTENJE JAVNE POVRŠINE

Član 14.

(Uslovi za izdavanje odobrenja za privremeno korištenje javne površine)

- (1) Privremeno korištenje javne površine može se odobriti ako su ispunjeni sljedeći uslovi:

- a) da se korištenjem javne površine ne ometa bezbjednost odvijanja motornog i pješačkog saobraćaja, ne smanjuje preglednost odvijanja saobraćaja, ne zaklanja signalizacija i slično,
 - b) da se ne ometa pristup okolnim objektima, podzemnim i drugim instalacijama, kao i korištenje postavljene urbane opreme, kao što su klupe za sjedenje, stalci za bicikle, kante za otpatke i slično,
 - c) da se ne nalazi na javnom prakiralištu, ventilacionom ili drugom otvoru,
 - d) da se korištenjem javne površine ne uništava zelena površina, ne stvara suvišna buka, vibracija, dim, prašina, neugodni mirisi, odnosno da se ne zagađuje životna sredina i ne umanjuje estetski i opšti izgled tog mjesta,
 - e) da kod postavljanja ljetne bašte prostor koji ostaje za pješake ne smije biti uži od 1,5m,
 - f) da ograda ljetne bašte od ruba saobraćajnice treba biti postavljena na udaljenosti od 1,5m, a da visina pokretne ograde ne može biti veća od 1m,
 - g) da ukoliko se prostor ljetne bašte nalazi djelimično ili u cjelosti na javnoj zelenoj površini, površina se mora zaštititi montažno-demontažnom podlogom,
 - h) da se u prostoru ljetne bašte može postaviti živica, žardinjera ili druga ograda koja se postavlja uz rubove bašte,
 - i) da se izložbeno – prodajni štand ispred trgovinskog i uslužnog objekta može postaviti u maksimalnoj širini od 1,0m i dužini prednje fasade objekta, izuzimajući ulaze u istu, s tim da odobrena površina ne može biti veća od 10m²,
 - j) da se reklamni objekti postavljaju na način da dimenzijom, oblikom i izgledom ne ugrožavaju bezbjednost učesnika u saobraćaju ili zaklanjaju postojeću saobraćajnu ili putokaznu signalizaciju, kao i korisnike susjednih objekata,
 - k) da natpis na reklamnom objektu mora biti čitljiv, tehnički i estetski oblikovan, uredno i jezično ispravan, te da svjetlom ili zvukom ne smije ometati stanare objekta, kao i korisnike susjednih objekata, a u skladu sa propisima kojima je regulisana ta oblast,
 - l) da svijetleći reklamni objekat mora biti upaljen cijele noći, u skladu sa režimom javne rasvjete, osim u slučaju štednje električne energije i drugim vanrednim okolnostima,
 - m) da veća reklamna konstrukcija mora imati statički proračun kao i elektroenergetsku saglasnost, ukoliko se priključuje direktno na elektroenergetsku mrežu, te ukoliko se električna energija koristi sa javne rasvjete korisnik je dužan plaćati naknadu prema prosječnoj potrošnji električne energije.
- (2) Nije dozvoljeno postavljanje reklamnih objekata na drveću, parkovskom zelenilu, na uličnim stubovima (rasvjetnim, saobraćajnim i drugim) i mostovima.

Član 15.

(Zahtjev za izdavanje odobrenja za privremeno korištenje javne površine)

- (1) Uz zahtjev za izdavanje odobrenja za privremeno korištenje javne površine koji se podnosi na propisanom obrascu, podnosilac zahtjeva prilaže:
- a) kopiju katastarskog plana i situaciju okolnog prostora sa ucrtanim dijelom javne površine,
 - b) rješenje o obavljanju djelatnosti za koju se traži zauzimanje dijela javne površine,
 - c) druge dokumente za koje se u toku postupka utvrdi da su relevantni za pripremu i izradu odobrenja za korištenje.
- (2) Uz zahtjev za izdavanje odobrenja za korištenje javne površine za potrebe postavljanja reklamnog objekta, pored dokumentacije iz stava (1) ovog člana, podnosilac je dužan da priloži i skicu reklamne naprave, tehnički opis, skicu ili fotografiju mjesta, a za svijetleću reklamu saglasnost vlasnika objekta, ukoliko je planirano napajanje električnom energijom sa susjednog objekta.
- (3) Zahtjev za izdavanje odobrenja za privremeno korištenje javne površine podnosi se službi nadležnoj za poslove prostornog uređenja najkasnije 30 dana prije datuma početka korištenja javne površine, izuzev zahtjeva za privremeno korištenje javne površine za postavljanje ljetne

bašte ispred postojećeg ugostiteljskog objekta koji se podnosi najkasnije 30 dana prije početka ljetne sezone.

(4) Služba nadležna za poslove prostornog uređenja vodi evidenciju podnesenih zahtjeva za izdavanje odobrenja za privremeno korištenje dijela javne površine koja sadrži: naziv i adresu korisnika, lokaciju, vrstu objekta, broj rješenja, period korištenja, djelatnost-namjenu, površinu, zonu i visinu naknade.

Član 16.

(Ugovor o korištenju javne površine)

(1) U postupku izdavanja odobrenja za privremeno korištenje javne površine, korisnik i davalac javne površine zaključuju ugovor o korištenju javne površine.

(2) Ugovor o korištenju javne površine posebno sadrži:

- a) podatke o ugovornim stranama,
- b) mikrolokaciju javne površine i njenu površinu,
- c) vrstu privremenog objekta,
- d) vrijeme trajanja privremenog korištenja,
- e) iznos naknade, način i rok plaćanja,
- f) svrhu i način korištenja,
- g) obavezu korisnika javne površine za pribavljanje odobrenja za korištenje,
- h) uslove i način prestanka ugovora,
- i) obavezu korisnika javne površine o uspostavljanju prijašnjeg stanja nakon prestanka ugovornog odnosa.

Član 17.

(Rješenje)

(1) Privremeno korištenje javne površine odobrava se rješenjem koje donosi služba nadležna za poslove prostornog uređenja.

(2) Niko ne smije koristiti javnu površinu prije nego na način propisan ovom odlukom, pribavi rješenje iz stava (1) ovog člana.

(3) Korisnik je dužan za cijelo vrijeme korištenja javne površine imati rješenje o privremenom korištenju javne površine, te je isti obavezan rješenje pokazati na zahtjev nadležnog organa određenog ovom odlukom.

Član 18.

(Sadržaj rješenja)

(1) Rješenje kojim se odobrava privremeno korištenje javne površine sadrži:

- a) ime i prezime, odnosno naziv firme i adresu podnosioca zahtjeva,
- b) vrstu privremenog objekta,
- c) detaljnu oznaku i površinu lokacije čije se korištenje odobrava,
- d) namjenu za koju se odobrava korištenje javne površine,
- e) vremenski period za koji se izdaje odobrenje za korištenje,
- f) podatke o zaključenom ugovoru o korištenju javne površine,
- g) urbanističko- tehničke uslove, a po potrebi i ostale uslove korištenja.

(3) Odobrenje za korištenje dijela javne površine izdaje se na određeno vrijeme.

(4) Nakon isteka važnosti odobrenja, korisnik može tražiti izdavanje novog rješenja.

(5) Služba nadležna za poslove prostornog uređenja će odbiti izdavanje rješenja o privremenom korištenju javne površine ukoliko se tokom postupka izdavanja rješenja utvrdi da podnosilac zahtjeva ima neizmirene obaveze po osnovu korištenja javne površine po prethodno izdatim rješenjima.

DIO ČETVRTI - PERIOD PRIVREMENOG KORIŠTENJA JAVNE POVRŠINE

Član 19.

(Period privremenog korištenja javne površine)

Javna površina može se privremeno koristiti za postavljanje privremenih objekata, naprava i opreme iz člana 4. ove odluke u sljedećem periodu:

- a) postavljanje kioska do 20 m² može se odobriti na period do tri godine, uz mogućnost produženja,
- b) postavljanje ljetne bašte ispred ugostiteljskog objekta i slobodnostojeće ljetne bašte može se odobriti za period trajanja „ljetne sezone“ koja se utvrđuje Planom,
- c) postavljanje zimske bašte može se odobriti za period trajanja „zimske sezone“ koja se utvrđuje Planom,
- d) postavljanje prodajnog slobodnostojećeg stola, odnosno pokretne tezge za prodaju proizvoda kućne radinosti može se odobriti na period do godinu dana, dok se postavljanje prodajnih stolova povodom pojedinih praznika za promet robe na malo: čestitke, ukrasi za novogodišnje i druge praznike, cvijeće i druge prigode utvrđuje najduže do 15 dana,
- e) postavljanje prodajnog izložbenog pulta može se odobriti na period do godinu dana,
- f) postavljanje reklamnog pano tipa: jumbo, billboard, megabilboard i reklamne vitrine tipa: city light može se odobriti na period najduže do četiri godine, a totema, jarbola i putokaza do godinu dana,
- g) postavljanje rashladnog uređaja može se odobriti na period do godinu dana,
- h) postavljanje aparata za prodaju kokica, kestenja, pečenjarskih proizvoda može se odobriti na period do godinu dana,
- i) postavljanje bine za manifestaciju može se odobriti na period dok traje manifestacija.

Član 20.

(Prestanak privremenog korištenja javne površine)

- (1) Privremeno korištenje javne površine prestaje da važi istekom odobrenog perioda korištenja javne površine.
- (2) Korisnik kojem je istekao period korištenja javne površine, a koji nije podnio zahtjev za produženje vremenskog perioda korištenja, dužan je nakon isteka tog perioda, privremeni objekat, napravu ili opremu ukloniti, a korištenu javnu površinu dovesti u prvobitno stanje.
- (3) U slučaju da korisnik ne postupi na način definisan u stavu (2) ovog člana, nadležna inspekcija provodi postupak prinudnog uklanjanja i uređenja javne površine o trošku privremenog korisnika.

Član 21.

(Prestanak privremenog korištenja javne površine prije isteka vremena)

- (1) Privremeno korištenje javne površine može prestati i prije isteka vremena na koje je izdato odobrenje za korištenje u sljedećim slučajevima:
 - a) ako korisnik ne koristi javnu površinu na način i u svrhe kako je određeno ovom odlukom, odnosno odobrenjem za korištenjem,
 - b) ako koristi veću površinu od odobrene,
 - c) ako se utvrdi da na odobroj javnoj površini djelatnost obavlja lice na koje nije izdato odobrenje za korištenje, odnosno ako je korisnik javnu površinu koja mu je data na korištenje dao drugom licu na korištenje,
 - d) ako korisnik dva mjeseca uzastopno ili tri mjeseca tokom jedne godine ne plaća utvrđenu naknadu za korištenje javne površine,

- e) ako korisnik bude tri ili više puta u toku kalendarske godine kažnjavan za prekršaj zbog nepridržavanja ove odluke ili drugih važećih propisa,
 - f) ako se utvrdi da je korisniku pravosnažnom odlukom nadležnog organa zabranjeno obavljanje privredne djelatnosti navedene u odobrenju za korištenje i ako odstupa od dozvoljene djelatnosti,
 - g) u slučaju raskida ugovora o korištenju javne površine prije isteka ugovorenog perioda,
 - h) ako objektivne potrebe nalažu drugačiji način korištenja javne površine na koju se odnosi odobrenje za korištenje,
 - i) u slučaju potrebe ili privođenja zemljišta krajnjoj namjeni u skladu sa važećim planskim dokumentom.
- (2) Služba nadležna za poslove prostornog uređenja donosi rješenje o prestanku privremenog korištenja javne površine ukoliko je ispunjen jedan ili više uslova iz prethodnog stava.
- (3) Protiv rješenja iz stava (2) ovog člana korisnik ima pravo podnošenja žalbe Drugostepenoj komisiji za rješavanje po žalbi protiv rješenja koja su donesena u prvostepenom postupku na osnovu Statuta Grada Zenica ili propisa Vijeća Grada Zenica (u daljem tekstu: Drugostepena komisija) u roku od 15 dana od dana prijema rješenja, koja ne odlaže izvršenje.

DIO PETI - NAKNADA ZA PRIVREMENO KORIŠTENJE JAVNE POVRŠINE

Član 22.

(Visina naknade za privremeno korištenje javne površine)

Naknada za privremeno korištenje javne površine plaća se po 1 m² zauzete javne površine i određuje se Tarifnikom koji donosi Gradonačelnik na prijedlog službe nadležne za poslove prostornog uređenja.

Član 23.

(Način utvrđivanja visine naknade za privremeno korištenje javne površine)

- (1) Visina naknade za privremeno korištenje javne površine zavisi od zone, djelatnosti i odobrenog dijela javne površine.
- (2) Površina iz stava (1) ovog člana određuje se odobrenjem za korištenje, a u površinu ljetne bašte uračunava se i površina živice, žardinjera ili druga ograda koja se postavlja uz rubove bašte.

Član 24.

(Način plaćanja naknade za privremeno korištenje javne površine)

- (1) Naknadu za privremeno korištenje javne površine, ako je odobreni period korištenja kraći od jednog mjeseca, korisnik plaća unaprijed u cijelom iznosu.
- (2) Naknadu za privremeno korištenje javne površine, za koju je odobreni period korištenja duži od jednog mjeseca korisnik plaća unaprijed u cijelom iznosu, prije preuzimanja rješenja o odobravanju privremenog korištenja javne površine ili mjesečno, što se reguliše ugovorom o korištenju javne površine.
- (3) Korisniku koji koristi javnu površinu u svrhu postavljanja ljetne bašte za cijeli period trajanja ljetne sezone i koji naknadu za korištenje za cijeli period trajanja ljetne sezone želi da plati unaprijed u cjelokupnom iznosu, naknada se umanjuje za 10% od ukupnog iznosa.
- (4) Korisnik može na osnovu podnesenog zahtjeva koristiti javnu površinu u svrhu postavljanja ljetne bašte i po isteku perioda ljetne sezone, te u tom slučaju plaća naknadu u visini 30% od utvrđenog mjesečnog iznosa naknade koji korisnik plaća za period ljetne sezone.

(5) Korisnik javne površine koji pripadajući inventar ljetne bašte „tenda i podij“ zadržava na javnoj površini nakon isteka perioda ljetne sezone, za isto plaća naknadu u iznosu određenom Tarifnikom o visini naknada za korištenje javnih površina.

Član 25.

(Sredstva od naknade i evidencija naplate)

- (1) Sredstva ostvarena od naplaćene naknade za privremeno korištenje javne površine su prihod Grada Zenica i koriste se za uređenje i održavanje javnih površina.
- (2) Evidenciju naplate naknade za korištenje javne površine vodi služba nadležna za poslove prostornog uređenja.

Član 26.

(Oslobađanje od plaćanja naknade za privremeno korištenje javne površine)

Na prijedlog službe nadležne za poslove prostornog uređenja, Gradonačelnik može zaključkom, odobriti privremeno korištenje javne površine bez plaćanja naknade u slučajevima obavljanja registrovane humanitarne djelatnosti, održavanja kulturnih, zabavnih i sportskih manifestacija koje se priređuju u humanitarne svrhe, manifestacija koje se održavaju pod pokroviteljstvom Grada što se smatra doprinosom Grada razvoju tih djelatnosti, kao i za ostale aktivnosti koje su od interesa za Grad o čemu odlučuje Gradonačelnik.

Član 27.

(Postavljanje gradilišne ograde, građevinske fasadne skele i prekop)

Javna površina može se privremeno koristiti za postavljanje gradilišne ograde, građevinske fasadne skele za deponovanje odnosno odlaganje građevinskog materijala, kao i za prekop javne površine pod uslovima i na način kako je to regulisano Odlukom o komunalnom redu Grada Zenica.

DIO ŠESTI - NADZOR I UPRAVNE MJERE

Član 28.

(Inspekcijski nadzor)

Inspekcijski nadzor nad provođenjem ove odluke vrši služba nadležna za inspekcijske poslove.

Član 29.

(Način obavljanja inspekcijskog nadzora)

- (1) Prilikom obavljanja inspekcijskog nadzora, nadležni inspektor ima pravo i dužnost da od osobe koju zatekne u korištenju javne površine zatraži na uvid odobrenje za korištenje javne površine.
- (2) Ako osoba iz prethodnog stava ne posjeduje traženo odobrenje ili isto odbije pokazati nadležni inspektor na licu mjesta zabranjuje korištenje javne površine.
- (3) Kad inspektor utvrdi da se javna površina koristi suprotno odredbama člana 17. stav (2) ove odluke rješenjem u roku od tri dana naređuje korisniku da bez odlaganja prestane koristiti javnu površinu i da je u određenom roku dovede u stanje prije početka korištenja.
- (4) Žalba na rješenja iz prethodnog stava ove odluke izjavljuje se Drugostepenoj komisiji i ista ne zadržava izvršenje rješenja.
- (5) Ako korisnik javne površine ne postupi po rješenju iz prethodnog stava, inspektor pokreće postupak prinudnog izvršenja.
- (6) Troškove prinudnog izvršenja i dovođenje javne površine u prvobitno stanje snosi korisnik javne površine.

DIO SEDMI - KAZNENE ODREDBE

Član 30.

- (1) Novčanom kaznom od 500,00 KM do 2.000,00 KM kazniće se za prekršaj pravno lice:
- ako javnu površinu koristi suprotno odredbama člana 4. ove odluke,
 - ako javnu površinu izdaje ili ustupi drugom licu na korištenje,
 - ako nakon prestanka perioda privremenog korištenja, ne vrati korištenu javnu površinu u prvobitno stanje,
 - ako započne korištenje javne površine prije nego pribavi odobrenje za korištenje javne površine.
- (2) Za prekršaj iz prethodnog stava ovog člana kazniće se odgovorno lice u pravnom licu novčanom kaznom od 250,00 KM do 500,00 KM.

Član 31.

- (1) Novčanom kaznom od 500,00 KM do 1.500,00 KM kazniće se za prekršaj pravno lice:
- ako javnu površinu koja je data na privremeno korištenje kao i objekte na njoj ne održava urednom,
 - ako na zahtjev inspeksijskog organa iz bilo kojeg razloga ne pokaže odobrenje za korištenje.
- (2) Za prekršaj iz prethodnog stava ovog člana kazniće se odgovorno lice u pravnom licu novčanom kaznom od 250,00 KM do 500,00 KM.

Član 32.

Za prekršaj iz člana 30. i 31. ove odluke kazniće se fizičko lice novčanom kaznom od 200,00 KM do 500,00 KM.

DIO OSMI - PRELAZNE I ZAVRŠNE ODREDBE

Član 33.

(Povjeravanje poslova)

- (1) Grad Zenica može ugovorom povjeriti vršenje stručnih i administrativno-tehničkih poslova vezanih za privremeno korištenje javnih površina, javnom preduzeću koje u okviru svoje osnovne djelatnosti obavlja poslove u segmentu korištenja javnih površina.
- (2) Poslovi iz prethodnog stava obuhvataju poslove pripremanja prijedloga ugovora o korištenju javnih površina, utvrđivanja visine naknade za korištenje javnih površina, vođenje evidencije o zaključenim ugovorima o korištenju javne površine, praćenje stepena naplativosti naknade za privremeno korištenje javne površine, te pokretanje postupaka prinudne naplate.

Član 34.

(Stupanje na snagu i početak primjene)

- (1) Stupanjem na snagu ove odluke prestaje da važi Odluka o korišćenju javnih površina ("Službene novine općine Zenica", broj 9/99 i "Službene novine Grada Zenica", broj 1/18).
- (2) Rješenja o privremenom korištenju javnih površina izdata do stupanja na snagu ove odluke ostaju na snazi do isteka roka utvrđenog u rješenju.
- (3) Kiosci koji, shodno članu II Zaključka Gradskog vijeća povodom razmatranja Informacije o načinu korišćenja javnih površina na kojima su postavljeni kiosci na području Grada Zenica broj: 01-45-6386/22 od 17.03.2022. godine, posjeduju potpunu urbanističko tehničku

dokumentaciju, nakon stupanja na snagu ove odluke, zadržavaju pravo korištenja javne površine u površini koja im je odobrena aktom službe nadležne za poslove prostornog uređenja.

Član 35.

Ova odluka stupa na snagu osmog dana od dana objavljivanja u "Službenim novinama Grada Zenica".

Broj: _____
Zenica, _____ **2023. godine**

**PREDSJEDAVAJUĆI
GRADSKOG VIJEĆA ZENICA**

Mirza Husečić

O b r a z l o ž e n j e

I Pravni osnov

Pravni osnov za donošenje Odluke o privremenom korištenju javnih površina sadržan je u odredbi člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH" br. 49/06 i 51/09), te u članu 21. tačka 2. i članu 116. Statuta Grada Zenica ("Službene novine Grada Zenica", broj 5/15).

Članom 13. Zakona o principima lokalne samouprave u Federaciji Bosne i Hercegovine propisano je da je organ odlučivanja u Gradu, Gradsko vijeće, te da isto u okviru svojih nadležnosti, između ostalog, priprema i dvotrećinskom većinom glasova usvaja statut jedinice lokalne samouprave, usvaja budžet i izvještaj o izvršenju budžeta jedinice lokalne samouprave, donosi razvojne, prostorne i urbanističke planove i programe, provedbene planove, uključujući zoniranje, donosi propise o porezima, taksama, naknadama i doprinosima jedinice lokalne samouprave u skladu sa zakonom, donosi odluke o upravljanju i raspolaganju imovinom jedinice lokalne samouprave, donosi programe uređenja građevinskog zemljišta, plan korištenja javnih površina, te obavlja i druge poslove utvrđene zakonom i statutom.

Članom 21. tačka 2. Statuta Grada Zenica propisano je da Gradsko vijeće u okviru svoje nadležnosti donosi odluke i druge opće akte kojima se uređuju pitanja iz samoupravnog djelokruga Grada.

Članom 116. Statuta Grada Zenica propisano je da Gradsko vijeće u okviru samoupravnog djelovanja donosi propise Statut, Budžet, planske dokumente, odluke, pravilnike, poslovnike i druge propise.

II Razlozi za donošenje Odluke

Odluka o privremenom korišćenju javnih površina donesena je na sjednici Vijeća općine Zenica održanoj 28.12.1999. godine ("Službene novine općine Zenica" broj 9/99), a Odluka o izmjenama i dopunama Odluke o korišćenju javnih površina donesena je na sjednici Gradskog vijeća održanoj dana 28.12.2017. godine ("Službene novine Grada Zenica", broj 1/18).

Navedenim odlukama određeni su uslovi davanja na privremeno korištenje javnih površina na području grada Zenica.

Imajući u vidu period donošenja odluke, kao i primjenu iste u praksi, konstatovano je da je potrebno pristupiti donošenju nove odluke s ciljem poboljšanja načina korištenja javnih površina, detaljnijeg regulisanja procedura, utvrđivanja naknade za korištenje javne površine, a sve u cilju prevazilaženja problema koji su uočeni u primjeni postojeće odluke u praksi.

III Obrazloženje pojedinih rješenja

Ovom odlukom definišu se sljedeća pojedina rješenja:

Članom 1. utvrđen je sadržaj odluke, odnosno pojam privremenog korištenja javne površine i oblasti koje se Odlukom obrađuju, a koja su od značaja za privremeno korištenje javnih površina.

Članom 3. utvrđene su površine zemljišta koje se smatraju javnim površinama.

Članom 4. i 5. utvrđene su namjene privremenog korištenja javnih površina, te definisani privremeni objekti, naprave i oprema koje se mogu postavljati na javnim površinama sa kratkim opisom istih.

Članom 6. utvrđeno je ko se smatra privremenim korisnikom javne površine.

Članom 7. utvrđeno je da se područje grada u pogledu korištenja javnih površina dijeli na četiri zone, koje su tačno definisane ovim članom. Ove zone nisu bile utvrđene postojećom Odlukom, već su iste definisane Tarifnikom o visini naknade za korišćenje javnih površina ("Službene novine Grada Zenica", broj: 4/15, 5/18,1/19 i 2/19).

Članom 8. utvrđen je način donošenja Plana korištenja javnih površina. Donošenje ovog Plana utvrđeno je u sklopu nadležnosti Gradskog vijeća koje su određene članom 13. Zakona o principima lokalne samouprave u Federaciji Bosne i Hercegovine i članom 21. tačka 10. Statuta Grada Zenica.

Članom 9. utvrđen je način dodjele lokacija za korištenje javne površine. Ovim članom propisano je da se dodjela lokacija na korištenje vrši na osnovu odobrenja izdatog od strane službe nadležne za poslove prostornog uređenja, a za namjene korištenja javne površine za postavljanje kioska, slobodnostojeće ljetne bašte i reklamnog objekta tipa „city light, yumbo,...“ putem javnog nadmetanja.

Članovima 10., 11., 12. i 13. utvrđen je postupak dodjele lokacija za privremeno korištenje javne površine putem javnog oglasa, način raspisivanja javnog oglasa, provođenje postupka, te donošenje zaključka o dodjeli lokacija.

Članovima 14., 15., 16., 17. i 18. utvrđen je način izdavanja odobrenja za privremeno korištenje javne površine što podrazumijeva definisanje uslova za izdavanje odobrenja, sadržaj zahtjeva za izdavanje odobrenja, ugovora o korištenju javne površine, kao i rješenja kojim se odobrava korištenje javne površine.

Članom 19. utvrđen je period trajanja privremenog korištenja javne površine za svaki privremeni objekat, napravu ili opremu pojedinačno.

Članovima 20. i 21. utvrđen je način prestanka privremenog korištenja javne površine.

Članovima 22. i 23. utvrđena je visina i način obračuna naknade za korištenje javne površine.

Članom 24. utvrđen je način plaćanja naknade. Stavom (3) predviđeno je da se korisniku javne površine, koji istu koristi u svrhu postavljanja ljetne bašte, ukoliko naknadu za čitav period ljetne sezone plaća unaprijed u cjelokupnom iznosu (dakle prije početka sezone), ista umanjuje za 10% od ukupnog iznosa. Stavom (4) ovog člana predviđeno je da korisnik koji javnu površinu želi koristiti po isteku perioda ljetne sezone plaća iznos u visini od 30% od utvrđenog mjesečnog iznosa. Navedeni stavovi predstavljaju novinu u odnosu na dosadašnji način plaćanja naknade. Naime, Tarifnikom o visini naknada za korišćenje javnih površina i Planom predviđena je mogućnost korištenja „grejs perioda“ koja se odnosila na mogućnost korištenja javne površine i po isteku perioda „ljetne sezone“ za korisnike koji bi platili cjelokupan iznos naknade prije početka sezone ili mjesečno do određenog datuma u mjesecu. S obzirom na ostavljenu mogućnost različitog utvrđivanja grejs perioda, bilo je potrebno jasno definisati i urediti način plaćanja naknade u smislu davanja određene olakšice kod plaćanja cjelokupnog iznosa naknade, te omogućavanje i drugim korisnicima da koriste javnu površinu po isteku perioda ljetne sezone, ali uz plaćanje određene naknade. Također napominjemo da u drugim općinama odnosno gradovima, ne postoji grejs period već se praktikuje sličan način plaćanja naknade za ovu namjenu.

Članom 25. utvrđena je namjena sredstava ostvarenih od naknade za privremeno korištenje javne površine, te vođenje evidencije naplate.

Članom 26. utvrđeni su slučajevi kada se korisnik javne površine može osloboditi od obaveze plaćanja naknade za korištenje javne površine, što se cijeni u svakom konkretnom slučaju.

Članovi 28. i 29. odnose se na mjere nadzora vezane za sprovođenje ove odluke.

Članovima 30., 31. i 32. utvrđene su kaznene odredbe.

Članom 33. utvrđeno je da Grad može ugovorom povjeriti vršenje stručnih i administrativno-tehničkih poslova vezanih za privremeno korištenje javnih površina javnom preduzeću koje u okviru svoje osnovne djelatnosti obavlja poslove i iz segmenta korištenja javnih površina, te su decidno navedeni poslovi koji bi bili povjereni.

Članom 34. i 35. propisano je stupanje na snagu, početak primjene i objava ove odluke.

IV Finansijska sredstva

Za provođenje ove odluke nisu potrebna posebna finansijska sredstva.

Služba za urbanizam